

Sarawak Dato' Stephen Kalong Ningkan meletakkan jawatannya dan digantikan oleh seorang Iban yang lain. Golongan yang menghendaki Ketua Menteri Sarawak meletakkan jawatannya itu telah pergi beramai-ramai ke ibu kota Malaysia – Kuala Lumpur – menjumpai Perdana Menteri Tengku Abdul Rahman. Sehari kemudian dari itu, dari Kuala Lumpur Tengku Abdul Rahman mengeluarkan perintah menuntut supaya Ketua Menteri Sarawak – Dato' Stephen Kalong Ningkan – mengosongkan tempatnya untuk orang lain – mengikut kehendak parti yang terbanyak.

Perbuatan atau isytihar Tengku ini, nampaknya kurang bijak dalam menyelesaikan sesuatu perkara. Sepatutnya sebelum beliau memberi sesuatu keputusan ada moleknya kalau beliau sendiri atau wakil beliau menjumpai pihak yang lain, sekurang-kurangnya untuk mendengar, kalau pun tidak mahu menerima hujah-hujah satu pihak yang lain. Sesudah itu bahanalah memberikan sesuatu keputusan dan memihak di mana-mana yang difikirkan membawa faedah. Cara ini tentunya tidak menimbulkan sebarang krisis dan tentunya orang tidak mengatakan gopoh, sekali pun sudah termuat bagi beliau hendak melucutkan jawatan Ketua Menteri itu kepada orang lain.

Kita berharap peristiwa ini kelak menjadi suatu tauladan bagi kemudian hari supaya di dalam tiap-tiap perkara kebijaksanaan patutlah digunakan di dalam soal ini kita tidak membela mana-mana pihak, tetapi kita menghendaki di dalam tiap-tiap perkara kebijaksaan hendaklah diutamakan.

\* \* \*

### Rumah Jamiyah

Menurut punca-punca yang mengetahui, bahawa ada daripada wang hadiah Jalalah al-Malik Faisal sebanyak £15.000 (\$126.000) yang dipersetujukan untuk mengadakan dewan untuk kaum Muslimin di atas nama Dewan Al-Malik Faisal di bangunan Jamiyah, pekerjaannya akan dijalankan tetapi tidak di bawah kuasa jawatankuasa Jamiyah, ia dikuasai oleh Dato' al-Syed Ibrahim Alsagoff, Konsul Agung 'Arabiyyah Sa'udiyyah , yang menjadi pula Yang di-Pertua Jamiyah, sekali pun beliau diplomatik dan rakyat asing.

Adalah dikatakan bahawa diuar-uarkan bangunan Jamiyah yang akan diruntuhkan dan di atasnya didirikan bangunan baharu daripada wang yang tersebut dan bangunan itu dikemukakan adalah tidak atas nama Jamiyah lagi tetapi atas nama rancangan itu.

Jika benar yang demikian ini, tak dapat tiada akan menimbulkan suatu perkara yang berlawanan daripada dikehendaki. Wakaf-wakaf atau derma-derma kepada bangunan Jamiyah yang ada tentunya akan hilang dan mungkin pula kelak bangunan itu akan tidak bernama lagi bangunan Jamiyah, dengan itu anggota Jamiyah tidak akan berkuasa atasnya sekiranya hak-hak itu tidak ditentukan dari sekarang.

Kerana tujuan meruntuhkan bangunan yang ada, dan bangunan itu bukan hak perseorangan malahan bangunan itu adalah ditaja dengan galakan yang utama daripada pengasas Jamiyah sendiri, almarhum maulana Abdul Alim, maka tiap-tiap sesuatu yang bakal mengubah, apalagi meroboh bangunan yang ada

menurut pandangan kita tidaklah boleh dilakukan melainkan dengan persetujuan mesyuarat agung Jamiyah – tidak dengan hanya sesuka hati Yang Dipertuaanya atau pun ahli-ahli jawatankuasa sahaja oleh itu kita peringatkan supaya kelak tidak perkara ini akan menjadi ribut hendaklah ada mandat lebih dahulu dicari sebelum membuat sesuatu langkah yang bakal merosakkan yang ada sedang pada masa ini Jamiyah tidak berhajat kepada bangunan yang indah tetapi kepada barang yang boleh mendatangkan hasil bagi dibelanjakan untuk menyempurnakan dakwah. Kerana itu tidaklah molek kalau bangunan Jamiyah diruntuhkan dan wang yang didermakan oleh al-Malik Faisal dihabiskan kerana mendirikan bangunan baharu. Yang utama tambah dan besarkan bangunan yang ada selebihnya belikan "harta" yang membawa hasil yang boleh digunakan untuk memajukan perjalanan Jamiyah kerana kita cukup mengetahui bahawa *fund* Jamiyah sekarang boleh dikatakan kosong – ini dapat dilihat daripada penyata tahunannya.

\* \* \*

### Perkara Yang Tidak Diingini

Di dalam keluaran ini ada ulasan mengenai ucapan Dato' Haji Othman bin Haji Mohd Saat, pemangku Menteri Besar Johor mengenai persoalan yang kita pandang menyakiti perasaan suatu golongan iaitu orang-orang Arab dan peranakan-peranakan Arab di dalam negeri ini. Dato' Haji Othman bin Haji Mohd Saat ialah anggota utama UMNO Malaya dan anggota Perikatan yang tentunya tiap-tiap katanya akan diperhatikan orang sama ada dari golongan UMNO atau